

Hiep Hiep Hoera!

Aruba a mostra su amor y respet pa Lio Booi cu un bunita fiesta uniendo cultura di Aruba y Bonaire



NO tin forma mas bunita di celebra e hacimento di aña di un baluarte di cultura, si no ta cu un bunita manifestacion cultural. Diarazon anochi un parti di Kamerlingh Onnesstraat a wordo sera pa celebra e hacimento di aña di sr. Lio Booi, un Arubiano adopta cu ta stima Aruba y a expresa esaki den diferente faceta y disciplina di arte.

Sr. Lio Booi, kende a nace na Bonaire, ta un gran promotor y sostenedor di e cultura di Aruba y t'e di tres persona na participa na crea nos Himno Nacional, Aruba Dushi Tera, hunto cu Rufo Wever (d.f.m) y Padu Lampe, kende tambe tabata entre e invitadonan celebrando Shon Lio su aña.



Entre invitadonan special e anochi aki tabata Gobernador di Aruba, sr. Fredis Refunjol y su casa; Presidente di Parlamento, drs. Paul Croes; miembro di Parlamento, drs. Rene Herde y Prome Minister di Aruba, mr. Mike Eman y su casa. For di Bonaire, Gezaghheber sra. Lydia Emerencia y Diputado di Cultura, sra. Silvana Seferina

tambe a rindi homenahe na sr. Lio Booi. Artistanan di tur edad a presenta riba stage pa demostra na sr. Lio Booi nan cariño, respet y aprecio cu musica, baile y canto.

E programa a cuminsa cu musica di Caha di

Orgel di Nelson Sprock, sigui p'e Himno di Bonaire canta pa Rachel Kraaijvanger, acompaña riba piano pa Maybelline Arends-Croes y Himno di Aruba presenta pa De Trupialen.

Pastor Jairo Maduro a efectua e bendicion, sigui pa Omaira Britten, cu un poesia dedica na Shon Lio y speechnan di parti di



e Diputado di Cultura y Gezaghheber di Bonaire.

E anochi tabata completo cu diferente otro grupo di baile y canto, como tambe e interpretan di musica tradicional di Bonaire cu un toke moderno, Rincon Boyz, kendenan a sera e evento.

Cultura y folklore di e dos islanan cu sr. Lio Booi tin den su curason a uni pa un anochi, unda su famia, amigonan y un publico grandisimo a gosa tambe di cuminda crioyo y a tuma un momento pa admira e diferente artesanian cu tabata exhibi.